

Salacòr

Chel di di mai

Par prin al à tacât a bajà Febo, il cjan di Pieri dal Bòrg disòt.

Nol bajàve di contentece, come quant c' al lave a còri fin tal flum o come quant c'al zuiave cui fruz.

Nol jere nànceje un bajà di fam parcè che al jere ancjemò ben pasût, ma un rugnà scontènt e lamentôs, a mieze vòs.

Pò, a' an tacât a bajà ance altris cjans e fintremai lontan dal pais, si sintive la lôr vos.

Intànt la gialine Luziute, che steve passonant tal curfîl di Pieri, si ferme di bòt e a salte sù i sghirèz.

E clame la so amie intente a becotà e i dis:

" Bepina atu sintût alc ? "

" Mi par di vê sintût un pìzzul sdramàs sòt lis zatis ma o' crodevi che a' forin stadis lis machinis; a' corin come mas! "

" Anin a domandà a lis ocis che a' son boconis e a' an buine orèle " – e dis Luziute e à clame Catine, che steve passonand su l' ôr dal fosâl.

" Di pô, Catine, atu sintût alc? Un sgrisul, un odôr, un trimàz ..."

Ma Catine stuargint il cuèl, dute supiarbiose i dîs : "fantasie di gialinis" e torne a pasonà viârs il riûl, menant il cûl di ca e di là.

" Oh! Propite ocie !" a' disin cimîant Luziute e Bepina, aviansi viârs il gablot dai cunins.

" Sioire Berta," si metin a clamà, " veso sintût alc? "

"Si po', un trimâ sot il me gablot ! Une robe strampe che mi à fât bati il cûr! "

disè la biele cunine dute blancie, tirant d'ongie di lor il mustic.

"O' soi plene di pore "e dopo vê saludât e torne svelte tal cjanton de stie, parmis dai soi piçui cunins, juste naşûs.

Tal fratimp la dindie e steve menât a passon i soi piçui tal broil.

Simpri atènte e caute, e lave atôr atôr di lôr par pore che une besteate, une pojâne i vignis a gafa i dindias, à jere pensierose.

Par solit, passonant par dute le bràide a' inquintrave vuarbitui o madràcs che à si gjoldevin il soréli, qualchi talpute vignude fur de tiare a cjapà un tic di ajar, lisiàrtis verdulinis che còrevin tra i claps, a barlumàve uciei, âs che a' svoletavin ma, chel di, nuje di nuje.

"Ce stramp"- dise la dindia - e dopo vê clamât i piçui e à speseât a tornâ a ciase rasint le cjarande.

Luziute e Bepina a decidin di là a cjacarà con Meni, il purcit.

" Meni" - i dise Luziute - "atu sintût alc "?

"Cè " à rispuint il purcit dut intent à sgrufuia e à mangià a s'ciafojon tal laip " mi quartistu alc di mangia?"

"Ti ai domandât se tu as sintût alc, un sdramas, une scopetade, une peteade, alc.."

" Cè" al bèghele di gnûf il purcit, "mi puarstitu alc?"

"Oh! Olin vie " disè Bepina a Luziute, " no si intive se l'e plui sord o plui cistròn!"

Ruspîos chel di a' dovevin jessi ancje i giàs.

Solitamente rufians e tacàs al fogolâr o indurmidîs tal soreli su la plane dal balcon, ben cidins e jerin lâs a platasî tai reces de cjase o dal zardin e Bafina la plui piçuiile dai tuis, si jere infilade sot la cuviarte dal jet.

Bepina e Lizziute, lant viârs il ciasâl di Pieri e passant denant le lobie, e an butât il vòli te stale des vacis.

Stèle e le Grisa mugulânt, a' tiravin la ciadène par podè slungia il cucl e cui lors voglons boins e malinconics a' cirivin le muse dei lôr vidiei, separâz, al di la dal tramiez.

Une robe di fa pene.

"Miôr no là a disturbà, quant che si trate di vidiei" e disin lis dôs gialinis e van indenent a' becolà, come dutis lis gialinis che becolant a' cjatin simpri alc di mangià.

Tornant viârs il pulinâr a inquintrin il cjan, che al bajave anciemò

"Ma parçe bajtu, Febo" - i domandin lis dôs amies - "a' son oris che tu fâsis bordel!"

"No sai, " - al dis il cjan - "o soi smaneos e malinconic e o' intivi alc ma cumò o soi strac e o' voi a polsà". E rugnânt al va a platâsi tal so cuizzo.

Ce žornade strane, a pensavin duciu, sarà par vie dal cjàlt, come quânt che ven la canicule in avôst e invessit, o sin dome al sîs di mai.

Intant 'e jere rivade le sere e la int, par la plui part 'e jere a ciàse.

Secònd la lôr costumance cui che a'l jere a dâ dongje le cene, cù regonàve la cusine, o daûr à fâ alc, cù che a'l jere bielzà a durmi, cui a fâ fieste cun i amis.

Sul timp di sere ancje Pièri, finît di lavorà in te fâbriche, al jere tornât in famee, e dopo vê governadis lis bèstis si gioldeve, cun la femine, la television.

E jere l'ore dal vivâl, di un joibe come tanc'.. a si diseve: joibe vignude, setemane zude ...

Dut come simpri.

Ma stave vignint, dal moment, une disdite teribil, une robone oribile.

Al si steve dismovint l'orcolat!

E lis bèstiis a lu vevin nulit.

I nemài, a sàvevin.

Al jere cinquante ains che chel malignas maladèt al durmive jù, tal grim de tiere e cumò, à si jere sveât.

E' veve tacât a spintonà, a dà puins, pedadis, spàladis, a sgnofrà, sdrondenâ simpri plui fuart, al voleve spacà il so landri par podè sejiampà da che scuritât, dal cupèz dal so mond segrèt e misteriôs par cumbinà disastros, cjatif come che al jere!

E peste e peste, al è rivât a tirasi fûr de so spiluncie e cussi 'e à scomenzât a masanà lis montagnis, a' spacà le tiare e dut chel che i capitave cun t' une fuarce inaudide e fasint un businôr spauròs.

E daspò, un sdramàs terrificant e lunc come il pàssio, un bôt di no rivâ a fasî une rasòn.

Al jere il taramòt!

E mieç Friûl, i pais e lis citadinis mètûs tra la planure e lis montagnis a son stâs ribaltâs, struçjâs, redrosâs, vuastâs,

Ciâsis e palâz, ciasai e stalis, glesiis, ciampanilis, fabrichis, scuclis, cjs'cjei, stradis.. dut sasinat.

Un taramòt cussi fuart che ancje il rest dal Friûl al è stât sacodât e il tremàz lu an sintût lontan lontan.

Il taramòt!

E la puere int ?

Cui che a' cirût di metisi al sigûr, altris 'e an cirût di sciampà, ma tanc' no an rivât nâncie a pensâ, a rindisi cont di ce che 'e capitave e a' son restâz sot.

Si veve simpri savût e ciacarât dal taramòt, che in Friûl al jere vignût plui e plui voltis: di chel dal vincejvot, di chei plui antîcs ma come di une robe 'za sucedûde tant timp fa e che fòrsit no l' sares tornade.
Biade ingenuitât.

La gnôt di chel sîs di mai 'e jê stade teribil.

L'àjar al jere imbuît e plen di pôlvar di no rivâ a tirâ il flât e il mònt al jere plombât tal scûr de gnot.

La înt, desperade, plene di pôre si dave une vôs, si clamave, si cirive; cui che à podût 'e à scomenzât a sgarfâ tra i rudinas par podê salvâ i parinc', i amîs.

Di buride 'e son rivâdis, dai lûcs dongie, lis autobulancis, i pompîrs, i soldâs a socori duc' e i ospedâi a' an viarzût lis puartis e an acolzût la pûere int feride.

Chê gnòt, in dute la Region, la înt, parvie dal sconquassament e je restade fur di ciase, cul cûr in man: nissun e a' durmît, tanc' 'e an preât.

Ma i umans a son lâz à viodi ancje de lis lôr bestis, par meti in libertât chês peadis tes stalîs, par cîri il cian, il giat di ciase e cetanc' di lor ' no e a' an dividût, par dute l'instât le lobie e ancje il gialinar cui amis nemai.

Ancje Pieri dal Bòrg disòt 'e à ciatât il so Febo, o pluitost a l'e stât Febo a cjatâ il siei parons!

I di dopo a son stâs plens di lavôr, di patimêns e di dolor, tant di piadi il sintimênt.

Une vore di cristians 'a jerin muarz, lis fameis no vevin plui il sô luc, 'a jerin in genoglon e il taramòt no l'smeteve di tormentâ.

E dopo une istât che prometteve alc, in setembar, chel sfondrât da l'orcolat 'e à dât un altri sdramàs tant fiuart che 'e à finît di desperâ la int e tanc' alore 'e an scugnût la vie, a Lignàn, a Grào par podê sopuartâ l'unviâr.

Il Friûl al jere un grum di rudinaz, no si ricognoševin plui i pais e “Glemone..che frute ridînt dai vôi di sede, nêris ciavei inghilandâs”.. 'a jere devastade!

Tant, che an dopo an, discòrint dal mes di mai si ricuardâra simpri ché grande disgrâzie.

Ce peciât, parcè che no 'e jere cusi prime dal taramòt e il mêl di mai al dave dolceze nome a dilû.

Mai, il mêl de Madone, mêl di preieris e di fiestis, il miôr par i nuvîz.

Mai, finit il frêt e dismenteât l'unviâr, plen di sprofûms, cul ventisèl che l'ciarezze, mêl dut vert, cun lis jârbucis prontis pa la fertâe, cun lis ciariesis di là a robâ, cun lis moris di mangiâ e sclopâ, il fen za pront pal toblât....

Une volte, par antic, su par i monz de Ciârgne à jere tradizion di plantâ, te place dal paîs un grant peç e dopo velu cuviart di nâstros e flôrs, i fantaz e lis fantatis sot i rams, ce ciânz e ce baj!

E par il Corpus Domini i fruz 'a prontâvin in glesie i mais, rams vers inflochetâs e vias la planure il mai si imbilive cun golosez par contentâ la zovine, la moròse.

Po' la vite, in tât paîs devastaz, planc a planc 'e jê rîpiade.

A son rivadis lis scuêlis, lis fabrichis, lis cjasis, lis glesiis e dopo tant, ancje lis cjampanis 'e an tornât a scampanotâ.

La jnt je stade brave e valòrose, i servizis e an proviudût e iudât, i sorestanz à son stâz galantòms, il Guvîâr 'e à fât la so part.

I ricuarz di che gnot e di chei mès no si podin scancelâju e a ogni sis di mài si torne indaûr
ma 'e vegnin in memòrie ancje i tanc' momènz di fraternitât, di amicizie che la int di fûr 'e
à offiart e i leàmps, cressûz chénti i paîs, par vê spartît chéi dis di dolôr.

In che eta dut il mond e veve savût dal disastro sucedût in Friul e a tanc' 'e veve tociât il cûr.
I furlans sparnizzâs par ognivie a son tornâs par iudà, par consolâ i parinc, i Fogolârs furlans
di dut il mont e altris Clapis e la Glesia, 'e an proviòdut al dibisùgne de int cun anime e
sostânze.

E distes, chei de plûme sul cjapiel, i netris alpins 'e an dât a manviarte.

Je stade una gâre di solidarietât e d'amor viars il néstri Paîs e la néste int e il mès di mài, mès
di rosis e sprofûms, di fiestis e di gnòzis al è simpri plui biel.
